

INUIT ATAQATIGIIT

Inatsisartuni



13. januar 2020

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

Naalakkersuisunut apeqquq:

- 1. Sila pillugu ilisimatusarfiup, Pinnngortitaleriffiup ataaniittup, <https://gcrc.gl/-ip>, sammisaata qiterivaa silap allanngoriartornerata issittumi inoqarfinnut uumasooqassutsimullu tunngasut ilisimatusarfiginerat, suliarineqartullu tamarmik tuluttut saqqummersinneqartarput.**

Namminersorlutik Oqartussat namminneq nittartagaat www.climategreenland.gl naammassillugu suliarineqarpassinngitsoq imarisamigullu nutarterneqarpassinngitsoq, pingaartumik kalaallisuaa eqqarsaatigalugu, takuneqarsinnaavoq.

- Silap allanngoriartornerata inuiaqatigiinnut uumasuseqassutsimullu sunniutai pillugit Nunatsinni innuttaasut paasissutissanik kalaallisut suliaasunik pissarsinissaminnut periarfissaat pillugit Naalakkersuisut qanoq politikeqarlutillu anguniagaqarpat?

- 2. Silap allanngoriartornerata inuiaqatigiinnut uumassuseqassutsimullu sunniutai pillugit nunarsuarmioqatigiit ukkatarinninnerat annertusiartuinnartoq malinnaaffigivarput, taamaakkaluartorli maani Nunatsinni silap allanngoriartornerata inuiaqatigiinnut uumasooqassutsimullu sunniutaasa piareersimaffiginissaannut Naalakkersuisut politikkiat periusissiaallu nassaariuminaallutik.**

- Silap allanngoriartornera pillugu periusissianik politikkimillu Naalakkersuisut pigisaminnik avitseqatigerusuppaatigut?

- 3. Sammisamut tunngatillugu paasissutissanik allanik Naalakkersuisut peqarpat?**

(Inatsisartuni ilaasortaq Sofia Geisler, Inuit Ataqatigiit)

Tunngavilersuut:

Nunarpassuarni suliniaqatigiiffinni, Inatsisartuni, Naalakkersuisuni nunallu tamalaat suliniaqatigiiffiini silap allanngoriartornerata inuiaqatigiinnut uumasooqassutsimullu kingunerisai pingaartilluinnarneqarlutik oqaluuserineqarlutillu iliuuseqarfiginiarneqarput. Tassunga assersuutitut taaneqarsinnaalluni ukiuni 25-nngortuni ukiut tamaasa ingerlanneqartartup sila pillugu Naalagaaffiit Peqatigiit ataatsimeersuartitsisarnerat.

Parisimi isumaqatigiissummut peqataaniarnani Nunarput 2016-imi aalajangerpoq. Imaanngilarli Nunarput silap allanngoriartorneranik sunnerneqanngitsoq. Akerlianilli pisoqartoq isumaqatigiisutigisinnaagunarpaput, tamannalu ersarilluinnartumik oqaluttuarineqarpoq Naalagaaffiit Peqatigiit sulisitaasa ilisimatuut nalunaarusiaanni, soorlu uani <https://www.ipcc.ch/srocc/chapter/summary-for-policymakers/>. Taamaattumik silap allanngoriartornera pillugu paasissutissat pillugit innuttaasunut ingerlatitseqqiinissaq pingaarutigilerujussuuvoq, soorlulusooq pingaaruteqaqisoq oqallinnermut sulinermullu ingerlaavartumut innuttaasut akuutinneqarnissaat.

Tamanna tunuliaqutaavoq Naalakkersuisunut apeqqutigisannut qulaani allassimasunut.

Kissaatigivara apeqqutikka ullut suliffiusut qulit qaangiutinnginneranni akineqarnissaat.